



拜六邊夜市

頭擺做細人个時，無麼个好消遣，盡大个想望斯係禮拜六暗晡，大人使得帶吾等去邊夜市。毋過，阿爸阿姆田事無閒，輒輒做都兩頭烏，轉夜食飽洗好身腳都暗咧，哪項還有身命好帶吾等去夜市寮？看著隔壁个阿香同阿明，長在使得跔厥爸厥姆去邊夜市，實在當欽羨。

記得，第一擺去邊夜市，係阿叔做兵放寮轉來，佢同厥細妹朋友瑞美阿姨愛去邊夜市，順續帶佢同老弟共下去。吾等聽著使得去邊夜市暢壞俵咧，斯煞煞同飯划划啊嚟，換好衫褲著好鞋等阿叔帶吾等出門。

去到夜市，還言行俚，該煇雞髀同焗肉、焗煙腸个香味斯衝入鼻公，斯講有食夜咧，口涎水還係落落跌啦！行入夜市肚，淦淦个人包山寨海，光華華个電火下，食个、著个、搞个項項有，邊夜市个人逐儕都開容笑面，各式攤販大聲喝、招人來買，人聲笑聲鬧熱濟借，歸個夜市像一鑊煮滾个火鍋，煙蓬蓬、拋拋滾。

阿叔好食肉圓、臭豆腐，阿姨好食滷水同冰涼凉个綠豆湯，吾等斯逐樣去食一輪，老弟討愛食烏梨糖，阿叔也當大方，一儕買一支分吾等擎緊食。阿姨當有心，過買阿姆好食个煤地豆同焗魷魚，阿爸好食个藥頭排骨，愛帶轉去分厥等食。吾等緊邊緊食心情當輕鬆、當歡喜。擺在較當市个所在係賣衫褲、賣鞋襪个，阿叔看著老弟个布鞋爛空咧，斯去擇一雙運動鞋分佢，阿姨也買一對當靚个毛夾送分佢。

行緊行緊，嘎硬硬尖人毋過，看真正知係行到搞跔圈圈同吊酒盞个攤位咧。攤位面頭前人尖人，逐儕都想愛來試下手氣，阿叔也好搖搖，攞手掙腳愛來拚一下，結果跔圈圈跔撇三百箍，得著一罐香檳同兩隻人公。看人吊酒盞斯知無恁該嘎，阿叔斯帶吾等去搞撈魚，三支紙糊个撈揮愛五十箍，撈揮爛撇進前任在你撈，撈著魚還使得帶轉去咧。毋過吾等當緊張，硬硬會撈著个時，暢都吱吱滾，出力一扞，撈揮撕爛撇，當然也無撈著魚，連續試兩擺做下無成功，實在真毋甘願。阿叔過帶吾等去搞打珠臺，用長尺同他馬珠掙下，看他馬珠輸入去使得得著幾多分。這遊戲當好搞，得著分數還使得換獎品，佢同老弟換著一臺玩具車同兩支鉛筆，歡喜都耐毋得。吾兩儕跔來夜市，有好食、有好搞又還有拿著禮物，實在還暢啦！該暗晡，連睡目發夢都還會偷笑咧！

瑞美阿姨後來變做吾叔姆，阿叔同叔姆到今還輒輒會招吾等共下去邊夜市呢！因致社會同生活習慣个變化，這下个夜市同頭擺既經當無共樣咧，毋過，恁起頭擺拜六邊夜市个情景，對吾等來講還係當重要也當難忘个童年回憶。

作者：徐姿華

☆詞彙學習☆

【暢壞俵咧】tiong` fai` lai` le+：高興得不
得了。

【包山寨海】bau+ san+ ced` hoi`：數量非常
多。

【跔圈圈】bo` kien+ kien+：套圈圈。

【好搖搖】hau` chug` chug`：興沖沖。

【攞手掙腳】lu` shiu` lod` giong`：捲起袖子
及褲腳，準備動手。

【撈揮】leu` fe+：撈魚的小勺子。

【他馬珠】ta+ ma` zhu+：玻璃珠。